

## Акафист Пресвятой Богородице пред иконой «Владимирская»



Аудио:

### Кондак 1

Взбранной Воеводе, Заступнице нашей, взирающе на первописанный образ Твой, хвалебное пение воспевает Ти раби Твои, Богомати. Ты же, яко имущая державу непобедимую, сохрани и спаси благодарне Тебе вопиующия:

Радуйся, Пречистая, от иконы Твоя милости нам источающая.

### Икос 1

Ангельския Силы на Небеси немолчно воспевают Тя, Пречистая, зряще Славу Пребожественную, еуже Сын Твой прослави Тя; но и нас, земных, не оставила еси, яко некую лучу, низпославши нам икону Твою, святым Лукою первописанную. О ней бо некогда изрекла еси: «С сим образом благодать Моя и сила да пребудут». Темже вернии раби Твои, по вся дни и на всяком месте сбытие словес Твоих зряще, ко образу Твоему цельбоносному притекаем и, якоже Самой Ти, с нами сущей, вопием:

Радуйся, Ангелов Царице;

радуйся, всего мира Владычице.

Радуйся, на Небеси присно славимая;

радуйся, и на земли величаемая.

Радуйся, благодать Твою иконе Твоей сей даровавшая;

радуйся, на спасение человеков тую поставившая.

Радуйся, Божия благодати скорая Подательнице;

радуйся, молений наших усердная послушнице.

Радуйся, Пречистая, от иконы Твоя милости нам источающая.

### Кондак 2

Видя чудес множество, от принесенных в Вышград святых икон Твоя бываемое, благоверный князь Андрей возгорется духом и умоляше Тя, да скажеша святую волю Твою и да благословиши его в пределы Ростовския отъити. Темже улучив желаемое и икону Твою взем, идяше в путь свой, радуяся и поя Богу: Аллилуиа.

### Икос 2

Разумеша вси людие дивное шествие Твое, Царице Небесная, от Киева в землю Ростовскую, болящии бо исцеляхуся и ина знамения и чудеса бываху всем с верою притекающим ко образу Твоему. Сего ради воспеша Тебе:

Радуйся, чудесы шествие иконы Твоя знаменовавшая;

радуйся, многи немощныя исцелившая.

Радуйся, воздыхания наша не отвергающая;  
радуйся, недостойныя молитвы наша приемлющая.  
Радуйся, Матерняя щедроты Твоя на нас изливающая;  
радуйся, иконою Твоею нам благодееющая.  
Радуйся, во обстоянии сущим скорую помощь дарующая;  
радуйся, отчаянным надежду возвращающая.  
Радуйся, Пречистая, от иконы Твоя милости нам источающая.

### **Кондак 3**

Силою Твоею ограждаемь, благоверный князь Андрей предел Владимирских достиже и zde благу волю твою, Владычице, позна. В ношном бо видении тому явльшиися, повелела еси от места сего не отходити и чудотворную икону Твою zde, во граде Владимире, поставити, да будет северней стране нашей в благословение и людем Твоим в покров, вопиющим Богу: Аллилуиа.

### **Икос 3**

Имея в себе благодатное сокровище, икону Твою Владимирскую, преуспеваше от силы в силу Отечество наше. Во дни бо обстояний и напастей не оставила еси род наш, Владычице, и во благовремении близ была еси, всесильным предстательством Твоим верныя люди Твоя заступающи, поющия Ти:

Радуйся, гнев Божий, праведно на ны движимый, утоляющая;  
радуйся, на милость к нам, грешным, Господа преклоняющая.  
Радуйся, яко смиренным мольбам рабов Твоих внимлеши;  
радуйся, яко утешение Твое нам подати поспешаеши.  
Радуйся, яко иконою Твоею от всяких нас бед ограждаеши;  
радуйся, яко тою козни вражия разрушаеши.  
Радуйся, в час скорби люди Твоя укрепляющая;  
радуйся, тихое и безмятежное житие тем дарующая.  
Радуйся, Пречистая, от иконы Твоя милости нам источающая.

### **Кондак 4**

Бурю помышлений сумнительных пройде благоверный князь Андрей, от множества врагов некогда обстоимь; Ты же, Всепетая, дивным от иконы Твоя знамением славную победу тому предвозвестила еси. Темже верою обновився и о имени Твоем дерзая, воспе Богу: Аллилуиа.

### **Икос 4**

Слышавше мятежницы убиение благовернаго князя Андрея, град Владимир расхитити устремишася, но икону Твою чудотворную, на стогны града изнесенную, внезапно узревше, умилишася сердцем и, на колена падше, во гресе своем покаяшася. Благочестивии же людие, таковому от иконы Твоя благодатному явлению радуящеся, песнь благодарственную воспеша Тебе:

Радуйся, междоусобных браней утоление;  
радуйся, ожестевших сердец умягчение.  
Радуйся, яко заблуждшия на путь правый возвращаеши;  
радуйся, яко от соблазнов суетных нас ограждаеши.  
Радуйся, пагубы вседушевныя низлагающая;  
радуйся, душевредная научения обличающая.  
Радуйся, к Царствию Небесному путь невозбранный нам указующая;  
радуйся, мир вечный и радость нам подающая.  
Радуйся, Пречистая, от иконы Твоя милости нам источающая.

### **Кондак 5**

Боготечная звезда отцем нашим бысть икона Твоя, Владычице, еяже светом ведоми, многажды побеждаху царствия, возмогаху от немощи, обращаху в бегство полки чуждых и путь к земному преуспеянию и небесному спасению обретаху. Сего ради по долгу славит Тя земля Российская, поющи Богу: Аллилуиа.

### **Икос 5**

Видевше некогда людие владимирстии в чуднем видении град свой на воздухе вознесен, и икону Твою верху его, якоже солнце, сияющую, со умилением разумеша, Владычице, неотступный покров Твой граду их и, Твое милостивое промышление о них славяще, воспеша Ти:

Радуйся, Мати милосердия;

радуйся, источниче чудес.

Радуйся, бодрая наша Хранительнице;

радуйся, граду нашему Покрове.

Радуйся, горе к Небеснем сокровищем ум наш возводящая;

радуйся, любовь к Богу в сердцах верных насаждающая.

Радуйся, маловерныя вразумляющая;

радуйся, неверных смыслы просвещающая.

Радуйся, Пречистая, от иконы Твоя милости нам источающая.

### **Кондак 6**

Проповедник неизреченных чудес Твоих, Владычице, явися соборный храм Твой во граде Владимире, святою иконою Твоею украшенный. Попущением бо Божиим все благолепие его некогда во огни погиге, икона же святая Твоя, якоже купина неопалима пребысть, да и видевше и осязавше присутствие Твое, вернии воспоют: Аллилуиа.

### **Икос 6**

Возсия паки свет иконы Твоя, Богородице, во дни лютаго нашествия Батыева. Аще бо нечестивии агаряне и пожгоша огнем соборный храм Твой, и святителя Владимирскаго и люди, молящияся в церкви, умертвиша, и вся конечному истреблению предаша, обаче икона Твоя и паки невреждена обретесе, подвизающи пети Тебе:

Радуйся, Купино Неопалимая;

радуйся, Сокровище неизживаемое.

Радуйся, Стено несокрушимая;

радуйся, прибежище всем уповающим на Тя.

Радуйся, икону Твою и во пламени целу сохранившая;

радуйся, нам во утешение и спасение тую оставившая.

Радуйся, Ты бо еси наше защищение;

радуйся, Ты бо еси всех благочестивых непрестанное радование.

Радуйся, Пречистая, от иконы Твоя милости нам источающая.

### **Кондак 7**

Хотя великий князь Василий защищение стяжати стольному граду своему, повеле Владимирскую икону Твою в Москву пренести. И во сретение ея усердно изшедше князь и святитель московский Киприан со освященным собором и всем множеством людей, до земли пред нею поклонишася, якоже бо Самую Тя, Пречистая, к ним приходящую, сретаху, зовуще Тебе: «О Мати Божия, спаси землю Русскую», вкупе же и поюще Богу: Аллилуиа.

### **Икос 7**

Новое знамение сотворила еси, Пренепорочная, в день празднования сретения иконы Твоя Владимирския в Москве: в грозном бо видении, яко всемогущая Царица, множеством воинств Небесных обстоима, со святители Московскими явилася еси нечестивому агарянскому хану и от предел земли Русския отъити повелела еси. Тогда вернии людие Твои, врага видевше посрамлена и бежавша, с веселием пояху Тебе:

Радуйся, Победо непобедимая;

радуйся, Царице Небесных Сил.  
Радуйся, врага грозное посрамление;  
радуйся, рабов Твоих Радосте нечаянная.  
Радуйся, Надеждо всех лишенных надежды;  
радуйся, спасение во дно адово низшедших.  
Радуйся, пришествием иконы Твоя Москва возвеселившая;  
радуйся, заступлением Твоим и град Владимир не оставившая.  
Радуйся, Пречистая, от иконы Твоя милости нам источающая.

### **Кондак 8**

Странную победу всесильною помощью Твоею, Владычице, без брани совершившуюся, и до ныне Церковь Православная светло прославляет, сретение иконы Твоя Владимирския празднующи и вся верная чада Своя созывающи милости Твоя благодарне исповедати, Сыну же Твоему и Богу пети: Аллилуиа.

### **Икос 8**

Всю Тя Бог освяти, Пренепорочная, и, яко Матерь Свою, в готовое прибежище и теплый покров всем нам дарова. Темже от меньших земли и незнаемых возвеличися благословенный Тобою град Москва, благочестно икону Твою почитай; вся бо племена русская воедино собра и область свою над окрестными языки от моря и до моря и даже до конец земли распростре, всем веру Христову возвещай, Тебе же вопия:

Радуйся, земли наша забрало;  
радуйся, Церкви утверждение.  
Радуйся, молитвенников наших похвало;  
радуйся, людей Твоих спасение.  
Радуйся, враги наша устрашающая;  
радуйся, полки чуждых далече отгоняющая.  
Радуйся, яко Тобою Русь православная содержится;  
радуйся, яко Тобою род христианский хвалится.  
Радуйся, Пречистая, от иконы Твоя милости нам источающая.

### **Кондак 9**

Всякое естество ангельское восхваляет Тя, Богородительнице, у престола Сына Твоего предстоящую и за страну нашу и вся христиане молящуюся. Мы же, людие Твои, молитв Твоих действие разумеюще, к чудотворней иконе Твоей с любовью притекаем и Богу прилежно вопием: Аллилуиа.

### **Икос 9**

Витий земных художество не довлеет по достоянию благохвалити Тя, Пресвятая Всенепорочная, и иконы Твоя чудеса исчислити, имиже Церковь Православная величается, гради наши утверждаются и вси христиане Божественно веселятся. Темже, за премногую любовь Твою к нам и вся милости Твоя, прими от нас сие хвалебное пение:

Радуйся, собором святых, в стране нашей просиявших, окружаемая и славимая;  
радуйся, предстателей наших, чудотворцев российских, моления приемлющая.  
Радуйся, ходатайством Твоим о нас Бога умилостивляющая;  
радуйся, честным покровом Твоим нас присно осеняющая.  
Радуйся, страны наша преславная Защитнице;  
радуйся, призывающим Тя скорая Помощнице.  
Радуйся, труждающихся благодатное укрепление;  
радуйся, кающихся грешников несумненное спасение.  
Радуйся, Пречистая, от иконы Твоя милости нам источающая.

### **Кондак 10**

Спасения ищуще, к Тебе прибегаем, Милосердная Мати, и, чудотворную Твою икону ныне обходяще, вся милости Твоя, тою отцем нашим явленныя, с любовию воспоминаем. Да не тщетна будет, Владычице, и наша надежда на Тя, на немощь нашу умилосердися и спаси вопиющия Богу: Аллилуиа.

### **Икос 10**

Стена еси и заступление всем с верою прибегающим к Тебе, Всеблаженная Отроковице; всегда бо милости Твоя роду христианскому являла еси и отцем нашим многочастне и многообразне благодаяла еси, от нашествия иноплеменник и от всякия беды и нужды тех избавляющи. Не оскудей и ныне, Владычице, утоляющи лютыя на ны возстания греховныя, и облак искушений отжени, Тебе бо навыкохом пети:

Радуйся, Мати Божия, Матернюю любовь к нам, грешным, простирающая;

радуйся, силою Твоею нашу немощь восполняющая.

Радуйся, милосердие Божие разумети нас научающая;

радуйся, к делом милосердия и нас возбуждающая.

Радуйся, страх Божий в сердца верных влагающая;

радуйся, грешники к покаянию призывающая.

Радуйся, невниманию нашему долготерпящая;

радуйся, от сна лености нас возставляющая.

Радуйся, Пречистая, от иконы Твоя милости нам источающая.

### **Кондак 11**

Пение похвальное воспеша московстии людие, спасение Твое некогда улучивше; верху бо явльшися, светозарною одеждою одеяна, храм Твой и град Москву от запаления огненного ризою Твоею защитила еси. Неотступна пребуди, Всемощная, от места сего и ныне, и нам избавление Твое видети даруй, да веселящися воспоем: Аллилуиа.

### **Икос 11**

Свет радости возсияла еси, Владычице, и во дни тыя, егда смотрением Божиим древняя красота церковная к нам паки возвратися и священный собор граду Москве Патриарха, всей же стране нашей единаго пастыря и молитвенника утверди. Ты же, Пречистая, от иконы Твоя Владимирския жребий первосвятительства сего избраннику Твоему даровала еси, да расточенныя овцы словеснаго стада Церкви Российския паки воедино соберет. Сего ради вопием Тебе:

Радуйся, скорбящих радосте;

радуйся, обуреваемых пристанище.

Радуйся, в напастех нас не оставившая;

радуйся, во унижении нашем свет надежды нам возсиявшая.

Радуйся, на смиренныя призревшая;

радуйся, низшедшия возвеличившая.

Радуйся, Церкви наша Похвало;

радуйся, людей Твоих веселие.

Радуйся, Пречистая, от иконы Твоя милости нам источающая.

### **Кондак 12**

Благодать Твою не отъими от нас, милости Источнице, якоже во дни лихолетия святителей наших Иова и Ермогена услышала еси и землю Русскую от конечнаго расхищения, православную же веру в ней от истребления спасла еси, да избавленнии Тобою Богу воспоем: Аллилуиа.

### **Икос 12**

Поюще неисчетныя милости Твоя, от лет древних роду нашему явленныя и донныне не оскудевающая, хвалим Тя, Пречистая, яко неусыпную Хранительницу нашу и заступление, и, Матернюю любовь Твою к стаду Сына Твоего ведуще, со дерзновением, аще и раби неключими есмы, вопием Тебе:

Радуйся, Русь Православную возлюбившая;  
радуйся, веру истинную в ней утвердившая.  
Радуйся, отцы наша во благочестии сохранившая;  
радуйся, и наше неможение не отринувшая.  
Радуйся, утверждение наше незыблемое;  
радуйся, Надеждо наша непостыдная.  
Радуйся, Молитвеннице наша теплая;  
радуйся, Заступнице усердная.  
Радуйся, Пречистая, от иконы Твоя милости нам источающая.

### **Кондак 13**

○ Всепетая Мати, Заступнице Всемиловитая, Дево Богородице, обычным Твоим милосердием малое моление сие наше приемлющи, якоже древле, тако и ныне помилуй землю нашу Русскую и от всяких бед рабы Твоя избави, о Тебе вопиющая: Аллилуиа.

*Этот кондак читается трижды, затем 1-й икос «Ангельския Силы...» и 1-й кондак «Взбранной Воеводе...».*

### **Молитва**

○ Всемиловитая Госпоже Богородице, Небесная Царице, Всемощная Заступнице, непостыдное наше Упование! Благодаряще Тя о всех великих благодеяниях, в роды родов людем российским от Тебе бывших, пред пречистым образом Твоим молим Тя: сохрани град сей (*или*: весь сию, *или*: святую обитель сию) и предстоящая рабы Твоя и всю Землю Русскую от глада, губительства, земли трясения, потопа, огня, меча, нашествия иноплемennых и междоусобных брани. Сохрани и спаси, Госпоже, Великаго Господина и Отца нашего (*имя рек*), Святейшаго Патриарха Московскаго и всея Руси, и Господина нашего (*имя рек*), Преосвященнейшаго епископа (*или*: архиепископа, *или*: митрополита) (*титул*), и вся Преосвященныя митрополиты, архиепископы и епископы православныя. Дажь им Церковь Российскую добре управити, верныя овцы Христовы негиблемы соблюсти. Помяни, Владычице, и весь священнический и монашеский чин, согрей сердца их ревностию о Бозе и достойно звания своего ходити коегождо укрепи. Спаси, Госпоже, и помилуй и вся рабы Твоя и даруй нам путь земнаго поприща без порока преити. Утверди нас в вере Христовой и во усердии ко Православней Церкви, вложи в сердца наша дух страха Божия, дух благочестия, дух смирения, в напастех терпение нам подаждь, во благоденствии — воздержание, к ближним любовь, ко врагом всепрощение, в добрых делех преуспеяние. Избави нас от всякаго искушения и от окамененнаго нечувствия, в страшный же день Суда сподоби нас ходатайством Твоим стати одесную Сына Твоего, Христа Бога нашего, Емуже подобает всякая слава, честь и поклонение со Отцем и Святым Духом, ныне и присно и во веки веков. Аминь.